

صوم الرسل

أسومين تو كيريو



لحن مثالي لصوم الرسل ... يربط فرحة الخماسين و حلول الروح القدس بخدمة و كرازة آباءنا
الرسل

سماع اللحن

التأمل

بكل اللغات (يوناني و قبطي و عربي)، بنصلي لحن رائع في توزيع صوم الرسل
هو لسان حال آباءنا الرسل في خدمتهم و كرازتهم

🐦 القرار: قيادة الروح القدس: صعد إلى أعلى السموات وأرسل لنا الباراقليط: روح الحق المعزي. آمين الليلوي

💡 معنى جميل جداً بنكرّره في كل رُبْع ... فهمه التلاميذ أخيراً بعد القيامة اللي بيها تمجّد ربنا يسوع و انتصر على الموت

💡 تبدّل الحزن و الخوف و الشك و الألم اللي حصل يوم الجمعة العظيمة إلى إيمان و قوة و فرح و تسبيح دائم

💡 و بعد 40 يوم من القيامة، صعد ربنا يسوع للسماء و مش هايشوفوه ثاني جسدياً

💡 لكن زي ما وعدهم يوم خميس العهد، أرسل لهم يوم ال50 روح الحق المعزي ... يحلّ فيهم و يعزّيهم و يعلمهم و يرشدهم و يقود الكنيسة

💡 نقدر نفهم أكثر دور الروح القدس في حياتنا من [الملخص ده](#)

و أما المعزي، الروح القدس، الذي سيرسله الآب باسمي، فهو يعلمكم كل شيء، و يذكركم بكل ما قلته لكم.

— يوحنا 14 : 26

😊 الربع الأول: تسبيح دائم:
فلنسبح الرب لأنه بالمجد تمجد

💡 الكنيسة من بعد القيامة في حالة فرح و شكر دائم ... و أهم عمل ليها هو التسبيح

💡 طبعاً ده مش بس لما الدنيا تكون مرتاحة و سهلة بل بالعكس: نسبح بالأكثر في الضيقات ... زي بولس و سيلا في سجن فيلبي

مكلمين بعضكم بعضاً بمزامير و تسابيح و أغاني روحية، مترنمين و مرتلين في قلوبكم للرب

— أفسس 5 : 19

✦ الربع الثاني: الصليب أزال كل الحواجز: جعل الإثنين واحداً . أى السماء والأرض

💡 طيب كرازة الرسل بإرشاد الروح القدس هاتكون إيه؟ إن الكل بقى واحد بالصليب

💡 السماء بقت زي الأرض ... زي ما مجد الله مالي السماء, كمان ربنا بمجيئه و فدائه (أصلح الأرضيين مع السمايين و جعل الاثنين واحداً) زي ما بنقول في القداس الغريغوري

💡 كمان معنى ثاني إنه وُتد اليهود و الأمم في كنيسة العهد الجديد ... المعنى ده ركّز عليه جداً القديس بولس الرسول إن اليهود مابقوش شعب مميز أو مختار و إنه ربنا يسوع هو لكل الشعوب حتى الأمم (بيتي بيت صلاة يُدعى لجميع الأمم) ... مابقاش الأمم يقفوا في الدار الخارجية بل بقينا نقدر ندخل قدس الأقداس و نتناول جسد و دم ربنا

لأنه هو سلامنا, الذي جعل الاثنين واحداً, و نقّض حائط السياج المتوسط

— أفسس 2 : 14

💡 كمان معنى ثاني إنه الكل واحد قدام ربنا يسوع مافيش حد أحسن من حد بمقاييس الدنيا (الغنى أو النسب أو الجمال أو الذكاء) ... بل المقياس هو الإيمان بربنا يسوع

ليس يهودي و لا يوناني. ليس عبد و لا حر. ليس ذكّر و أنثى, لأنكم جميعاً واحد في المسيح يسوع

— غلاطية 3 : 28

✠ الربع الثالث: كنيسة واحدة جامعة رسولية: تعالوا يا جميع الشعوب لنسجد ليسوع المسيح

- 💡 دي ببساطة كرازة الرسل: يروحوا يفرّحوا كل الشعوب ببشارة الإنجيل (البشارة المفرحة)
- 💡 و يقولوا لكل بلا استثناء: ربنا جه و فداك ... لو قبلت هذا الفداء, لك الحياة الأبدية
- 💡 نفس دعوة آبائنا الرسل دي لازم تكون دعوتنا لكل ... إحنا لقينا ينبوع الحياة و الماء العذب ... تعالوا ذوقوا معانا
- 💡 طبعاً كثير قلبهم قاسي و مش هايقبل (زي ما شفنا الاضطهاد على مدار الأجيال) ... لكن الكنيسة مالهاش رسالة ثانية و ماحدّش يقدر يوقّفها

ففتح بطرس فاه و قال: بالحق أنا أجد أن الله لا يقبل الوجوه. بل في كل أمة, الذي يتّقيه و يصنع البر مقبول عنده. الكلمة التي أرسلها إلى بني إسرائيل يبشّر بالسلام بيسوع المسيح. هذا هو رب الكل.

— أعمال الرسل 10 : 34 ل 36

✠ الربع الرابع: ليس بأحد غيره الخلاص: هذا هو الله مخلصنا. و رب كل جسد

- 💡 الكنيسة دايماً بتشاور على ربنا يسوع في كرازتها ... هذا (اللي احنا شفناه و عرفناه) هو الله مخلصنا
- 💡 طبعاً الناس بتدور على الخلاص بطرق مختلفة ... اللي بيدور على المال و اللي بالنسبة له الخلاص هو الصحة و اللي في مشكلة بالنسبة له الخلاص هو نهايتها

💡 نقدر نسمع أكثر في الوعظة دي

💡 لكن الحقيقة كل دي طول مؤقتة بتنتهي ... الخلاص هو فداء ربنا يسوع على الصليب ... ده اللي يخلينا أحرار من عبودية الشيطان و يفتح لنا أبواب الملكوت

و ليس بأحد غيره الخلاص. لأن ليس اسم آخر تحت السماء، قد أُعطي بين الناس، به ينبغي أن نخلص

— أعمال الرسل 4 : 12

🔑 الربيع الخامس: عقيدة سليمة:

ثالوث في واحد و واحد في ثالوث. الآب و الابن و الروح القدس

💡 طبعاً الشيطان مش هايقف ساكت، بل هايحاول بمكر أحياناً و بغُف أحياناً يهزّ إيمان الكنيسة و عقيدتها

💡 طبعاً كنيسة بدون عقيدة سليمة و إيمان صحيح مافيهاش أي خلاص حتى لو جمعت كل الدنيا

💡 عشان كده أهم حاجة فيها تسليم بمنتهى الحرص و دون المساس أو التعديل إطلاقاً هي الإيمان و العقيدة ... طبيعة الله الواحد المثلث الأقانيم اللي استلمها آبائنا الرسل من ربنا يسوع و سلّموها لينا على مدار الأجيال

💡 آبائنا الرسل دفعوا حياتهم للحفاظ على هذا الإيمان و بعدهم كثير من الشهداء و أبطال الإيمان على مدار تاريخ الكنيسة

فاذهبوا و تلمذوا جميع الأمم و عمّدوهم باسم الآب و الابن و الروح القدس

— متى 28 : 19



ربنا يدّينا نسبّح بالروح و الذهن و القلب ... نفهم عظمة ألحان كنيستنا اللي بتفرّحنا و تدّينا
بهجة و وجبة مشبعة